

neufuiesme

MONSIEUR & Cousin vous avez bonne grace d'estimer que ie vous puisse apprendre des nouuelles du monde, comme si vous ne sçauiez pas que ie m'en suis il y a long tēps sequestre & pris vn tel degoust des vanitez qui s'y rencontrent, que ie n'ay maintenant plaisir qu'à la recherche d'une vie tranquille qui me retire du Trictrac des affaires pour me donner tout entier a moy mesme, de sorte que i'estime ma vie plus fortunée de pouoir à la Diogenique, rouller doucement mon miserable tonneau, que d'estre agité des diuerses passiōs qui d'ordinaire bourellent les esprits de ceux qui vont muquetant les grandeurs de la terre: Ceste retraicte (cher Cousin) me fourniroit de pretexte vallable, de faisfaire à vostre curiosité si la proximité ioincte à plusieurs obligations que ie vous ay ne me cōtraignoient de faire vn effort & en mon ramage vous faire part de ce peu que ie sçay.

Rien ne me rait tant que quand ie considere l'estenduë de nostre ville, l'embellissement & accroissement d'i-

celle par de nouuelles villes qu'on y a
adiouſtées depuis les derniers trou-
bles qu'en y auez eſté, & m'eſtonne que
voſtre deſir ne vous porte de venir voir
ceſte merueille du monde, admirée de
ceux qui n'admirent rien de medio-
cre, ie ſuis aſſeuré que n'y recognoi-
ſtriez, preſquer rien des ydées que vous
en deuez auoir du paſſé, peut eſtre at-
tendez-vous la fin de ces baſtimens
pour veoir en gros ce que nous voyons
en detail, voſtre deſſein ſeroit loüable
ſ'il n'alloit a l'infiny, il y en a aſſez pour
nos enfans, leſquels bien que ieunes,
ne ſe peuuent promettre de veoir para-
cheuer la ſeule entrepriſe des baſtimés
del'Iſle Louuiers & du Pont S. Louys
encômencé depuis quelques mois. Si
d'un coſté tant & tant d'edifices m'eſ-
tonnent, ie ſuis bien plus emerueillé
quand paſſant d'un quartier à l'autre ie
rencontre vn tel flux & reflux de peu-
ple qu'il ſemble eſtre impoſſible de
trouuer aſſez de couuert pour retirer
tant de milliers d'hommes qu'à peine
● s'en pourroit-il autant tirer de la meil-
leure Prouince de France: les richesses
& l'abondance d'or & d'argent & de

toutes autres bagatelles qui se rencontrent à la fuitte de ce peuple, fait que la misere du plat pais n'est recogneuë de ceux qui n'ont autre obiect que les cōmoditez d'une grande ville ou tout abonde avec excez.

Mais ie crains que Paris soit à la France ce que la ratte est au corps laquelle ne s'acroist qu'au dōmage des autres parties, vous en pouuez recognoistre plus que moy estāt sur les lieux qui resistent les incōmoditez publiques & qui ont part aux miseres cōmunes de la cāpagne, & bien que vostre condition & les seruices que vos Ancestres & vous auez de temps en tēps rēdus aux Roys & a vostre patrie, vous doiuent affrāchir de toutes seruitudes, neantmoins ie me persuade qu'ē quelque sorte vous en resētes les incōmoditez, quād il n'iroit que de l'interest de vos meteyers, que vous estimez estre seuls foulez & toutes fois par reflectiō leur perte tombe sur vous toute entiere, vous ne l'aperceuez que trop souuēt, les plaintes que m'auez autre fois faictes de l'insolubilité de quelques vns des vostres vous en rendent certains tes-

moignages, cela estant il ne se faut
estonner si l'on veoit aujourd'huy les
villes notamment celles qui sont fran-
ches remplies d'un monde de peuple
qui s'y retire comme en un port ou ils
croyēt estre à l'abry des orages & tem-
pestes qui les menacent de ruine ail-
lieurs: Sur toutes ces villes nostre Pa-
ris est le seiour des ames franches, ou
chascun en sa condition rencontre
toutes sortes de cōmoditez a souhait,
cela fait qu'on y accourt de toutes
parts & que celuy est estimé tres heu-
reux a qui la fortune a donné de quoy y
passer doucement sa vie: Mais ie quitte
ce discours pour vous dire que ceste
villene fust iamais honorée de tant de
grands personages, comme mainte-
nant que les Estats Generaux y ont
amené ceste celebre assemblée cōpo-
sée des plus rares esprits de ce siecle,
triez de chascune Prouince & choisis
pour la restauratiō de l'Estat qui auoit
besoing de ce salutaire remede qui
luy a esté heureusement procuré par la
plus vertueuse & iudicieuse princesse
qui ayt iamais eu la gouuernail de la
France en main, par le moyen de la-

quelle nous attendons de nostre Roy
 de saintes resolutions sur les propo-
 sitions qui luy seront faictes pour le bien
 de ce Royaume, ayant tesmoigné a
 toute la Frāce à l'ouuerture des États
 n'auoir rien en plus singulliere recom-
 mandation que de suiure les bons ad-
 uis qui luy seront donnez; Voila l'vne
 des plus importantes & meilleures
 nouuelles dont ie vous puisse asseurer,
 qui est vne esperance que deuons auoir
 que Dieu conduira c'est œuure à sa per-
 fection, puisque le cœur du Roy (qui
 est en sa main) est touché de ce desir,
 ainsi que desia nous en ressentions l'ef-
 fect par les surceāces qu'il a accordées
 de plusieurs commissions mesme de
 l'expedition des quittances pour le
 droit annuel: ie ne vous puis dire avec
 quelle instance tous les gens de bien
 demandent la reuocation de ceste ma-
 l'heureuse inuention, qui a ouuert la
 bonde a vn deluge de maux qui seront
 suiuis d'infinis autres si a bon esciēt on
 n'y met la main, si on ne remeuē ceste
 pierre de scandalle & d'achoppement,
 c'este Paullete l'azille de l'ignorāce, qui
 comme les pōmes d'Atalante font ou-

blier la courſe a ceux qui ont enuie de bien faire , Paulette ſemblable à ces mouches Chenines qui ſe iettent pluſtoſt ſur la partie Yſtiomenée que ſur les fleurs, qui fait ſouuent monter aux charges les plus importantes & releuées des perſonnes ſans merites , tandis que les gens de bien tous pantois les bras en eſcharpes & les iâbes croiſées font retentir le Ciel de leurs iuſtes plaintes, Paulette encores le cloacque d'où deſcoulent tant de maux, en vn mot la Comette de nos mal'heurs, & neantmoins ô temps ô mœurs! en ce ſiecle ou nous ſômes, il ſ'en trouue qui vont flattât noſtre mal , & qui preoccupez de leur intereſt particulier le deguiſent par de faux pretextes fondez ſur des maximes tres pernicieuſes a l'eſtat & ſous vne pillure dorée nous veulent faire aualler le poiſon capable d'infecter nos eſprits qu'ils ſ'efforcent de gangner par le grand intereſt qu'on represête du manquemêt de ce fôds, comme ſi nous auions vn Roy qui preferaſt ſon proffit particulier à celuy de ſon peuple: Arriere profanes qui voulez ſous de fauces apparences ternir la

plus brillante qualité de mon Prince ie
dis d'un Roy en effect & en effects, qui
thesaurise & fait vn amas des cœurs de
ses suiets & nō pas de leurs depouilles,
il peut tout ce qu'il veut en son Estat,
mais il ne veut pas auctoriser vne si dā-
gereuse engēce, & souuenez-vous que
si il est necessité encores pour quelque
tēps d'en souffrir le cours, d'autres biē
plus grandes considerations luy cōui-
ront, mais non pas le desir de cōseruer
ce fonds, Nostre Hēry le Grād son pe-
re autant ou plus mesnager que luy a-
uoit trouué quelque goust en ceste
Paullete, mais il n'en vouloit plus mā-
ger, non plus que ceux qui auoient vne
fois gousté de ces sortes de Pommes
qu'on appelloit vnedones qu'ils trou-
uoient d'un goust fort plaisant, mais
quelque bōté qu'il y eust ne pouuoient
estre persuadez d'y retourner, on sçait
assez qu'elle estoit la resolution de ce
grād Monarque, ceux qui de plus pres
approchoient ses saints Autels en sçau-
roient que dire: il recognoissoit assez
qu'outre infinis autres inconueniens
qui en pouuoient arriuer ceste Paulette
eroit en fin la perte des meilleures fa-

milles de son Royaume, de celles mes-
 me qui la desiroient le plus, & que
 cōme le lyerrenes s'atache a la muraille,
 que pour en menacer la ruine, bien
 que pour vn temps il soit agreable, que
 de mesme la Paulette qui ne se pou-
 uoit eterniser, iacoit que plausible
 pour vn temps emporterait avec soy, &
 causeroit la ruine, de ceux qui soubz
 la faueur de ce droit, se feroient enga-
 gés a des offices au dessus de leur pou-
 uoir, ce qui est pour le iourd'huy si ordi-
 naire que les plus sages qui s'esloignēt
 de ceste cōtagieuse passion, & qui ne se
 veulent embarquer sans biscuit, sont
 mesestimez & tenus pour imprudēs de
 ne se seruir de l'occasion & en est ceste
 manye paruenue iusques la, que celuy
 à peine peult atteinre a vn mariage
 sortable a sa condition s'il n'est pour-
 ueu d'office, voire que celuy qui en se-
 ra pourueu, & qui en aultre chose se
 trouuera de beaucoup inferieur, sera
 non seulement preferé, mais qui plus
 est recherché, fust il yssu d'un lieu ab-
 iect, & ou il y auroit a redire, de la vient
 que les anciēnes maisons qui autresfois
 n'eussent voulu pour chose quelcōque
 admet-

admettre en leurs familles , sinon ceux
 qui leurs estoient esgaulx en extraction
 sont contraincts de s'allier de person-
 nes de villes & de peu d'estime (sauf
 l'honneur de leurs charges) qui retien-
 nent tousiours des moeurs de leur
 estre , qui sentent le rence & l'odeur
 de la premiere liqueur , d'ot ils ont esté
 imbus , mais le pis est qu'oultre ce le
 plus souuét on se trouue deceu de moi-
 tié de iuste prix , & que tel qui est esti-
 mé auoir vn office n'en a que la moitié
 voire quelquesfois le tiers , le reste luy
 ayant esté presté sur les asseurances de
 sa procuration & des quittances du
 droit annuel , & tel s'est treuue de bas
 lieuestimé ayse soulz l'esclat de sa qua-
 lité , auoir espousé vne fille de maison ,
 qui luy portoit des commoditez beau-
 coup plus qu'il n'en auoit qui ne suffi-
 soient aracheter le reste de son office ,
 ainsi tout comté & rabattu monsieur
 le Facquin trouuoit s'estre acquis avec
 grands biens, vne honorable alliance à
 la faueur de la Paulette qui luy auoit
 seruy d'instrument à sa tromperie, mais
 ceste medaille ordinairement à pour
 reuers les diuorces qui en naissent

estant fort rare qu'une mauuaise cause
 puisse produire un bon effect, & qu'un
 mariage contracté soubz une telle
 fraude puisse long temps subsister en
 paix, nous n'aperceurons que trop les
 malheurs qui en arriuent, & pleust à
 Dieu qu'ils ne fussent si frequents, nous
 ne verrions pas tant de familles eston-
 nées la pluspart obligées au silence, &
 a faire bonne mine pour n'oser descou-
 urir leur mal auquel la prudence hu-
 maine ne peut apporter de remede,
 voila cousin, a quels termes sont main-
 tenant reduicts les mariages en ceste
 ville, ie croy que les autres n'en sont e-
 xemptes pour le moins il ny a pas long
 temps qu'un de mes parens qui vous
 attouche de fort pres, m'escriuoit qu'un
 quidan, qu'il aduoüoit pour honneste
 homme s'estoit engagé à la recherche
 de sa fille duquel il eust fort desiré l'a-
 liance, mais qu'il n'auoit point d'office
 & qu'a ce subiect l'affaire n'auoit peu
 reussir, ie vous laisse a penser si celuy la
 qui est tenu de tous pour prudent &
 aduisé, s'est laissé gagner a ceste affe-
 ction, ce que l'on doit esperer des au-
 tres qui sont moins recommanda-

bles, tant que ceste erreur durera, les offices seront recherchez, & quoy qu'ils soient montez a vn tel prix que l'excez en soit môstrueux, si est ce qu'õ ny doibt attendre aucune moderation mais bien plustost vne augmentation de prix, aussi long temps qu'ils seront au plus offrant & que chacun y sera receu pour son argent, car il ne faut douter que ceste porte estant ouuerte a toutes sortes de personnes indifferement, ceux auxquels ce bien estoit inespéré de pouuoir atteinre aux charges lesquelles autresfois ne s'acqueroient que par la vertu, coucheront de leur reste pour y paruenir. De ce mal en naîsset deux autres de non moins d'agereuse consequence, l'vn qu'a ce subiect les arts sont delaissez, le trafic qui nagueres estoit l'exercice ordinaire de la plus part de ces concurrans est abandonné de tous fors des estrangers, qui scauent bien faire leur proffit, de nostre dommage & mesnager l'occasion tandis que la vanité possede les esprits des François, l'autre inconuenient que les cõpagnies, voire souueraines serempliront peu a peu, de gens de peunez

dans l'ignorance & incapables de leurs
 charges , lesquelles si elles sont posse-
 dees par gens de merites elles seront
 exercees avec la pureté , & candeur re-
 quise , autrement il semble qu'il y ayt
 quelque sorte de raison, que celuy qui
 aura si cher achepté son office , soit de
 finance ou autre , se rembourse en de-
 tail de se qu'il aura donné en gros, il se-
 roit trop long de vous raconter les a-
 bus que la Paulette introduict , entre
 lesquels celui-cy n'est pas des moin-
 dres que les gens de boutiques , & au-
 tres de poix & de mesures , par le moy-
 en du prix excessif des Offices , & de
 l'assurance d'iceux , ayant reculé &
 esloigné des charges tant de ieunesse
 ystus des anciens officiers de la France
 qui esperoient suyure le chemin que
 les peres leur auoient tracez , ceste ie-
 nesse demeure inutile , n'ayant moyen
 d'estre employez en la vacation , en la-
 quelle la nature les auoit fait naistre ,
 & trouuant ainsi leurs places occu-
 pees se laissent engager dans le puant
 & sale boubier de l'oisiuete , qui com-
 me l'anchanteresse Circé , transforme
 les hommes en bestes , qui au dire de

Plutarque renoist nos esprits , moisit les fonctions de nos ames , & ternit nos plus belles actions , oyssiueté que iose dire estre la premiere de tant de maledictions que nous voyons s'esleuer de toutes parts en ce siecle auquel les desbauches sont passees en nature & tournées en complexions, en vne ville ou il semble qu'à la ieunesse tout soit permis fors de bien faire, & puis nous ferons mise de tant d'edicts faits cōtre le ieu, les duels, & les blasphemes, rien moins ils ne seruent qu'à nous faire rougir de honte du peu de debuoir qu'on apporte a les obseruer , le seul moyen pour retenir le peuple & le retirer de ce labirinte c'est l'employ & le diuertissement aux exercices chacun en sa cōdition, les estats les mieux policez en ont ainsi vsé, voire qu'en quelques endroiets que l'histoire nous designe chacun portoit la marque de sa vacation: s'il n'y est pourueu de la sorte le mal ira en empirant, quelque remede qu'on s'efforce d'y apporter par des deffences au contraire, l'esprit de l'hōme mesmement du François veut de l'occupation, s'il ne r'encontre matie-

re preparée pour faire le bien sans doute il court bien tost au mal , au prix de sa ruine , les Academies que nous voyons aujourdhuy establies presque par toutes les bonnes villes de la France , comme des escolles de piperies n'ont esté introduictes qu'enniron le temps de la Paulette par les faineans pour passer leur temps , ie sçay bien que depuis beaucoup d'aultres si sont fourrez , & que quelques officiers , maintenant tiennent le hault bout en ces brelants, d'ou sont sorties plusieurs bâqueroutes faictes au Roy. Il faut que ie vous aduouë, cousin qu'il m'en a pris comme a Pitagoras , lequel pour ne rien ignorer de la caballe des Iuifs , se fist circonconcire, pour avec plus de liberté habiter parmy eulx , l'enuye que i'auois d'auoir qu'elque cognoissance de ce qui ce passoit en ses Academies, me les a faict frequenter quelque temps , vous ne scauriés croire que les blasphemés y sont à bon marché, c'est vne perpetuelle tragedie , ou chascun y iouë son personnage à tour de roolle, tantost vne fiebureuse ardeur surprendra celuy cy du desir qu'il aura de des-

pouiller son compagnon, ores vn perpetuel frisson saisira l'autre qui sera en gain de craincte du reuers qu'il ne peur esuiter à la premiere rencontre, le desespoir, & la fureur de ceux qui y font naufrage est deplorable, & plus digne de pitié que de risée, il me souuient que l'vn de ceux cy s'estant adressé a moy, & m'ayant prié luy faire quelque prest, ie pris de la subiect de luy dire mon aduis sur le mauuais train que ie voyois qu'il prenoit, & ce d'aultât plus franchement que le cognoissant appartenir a gens de bien & de qualité, sa perte m'estoit beaucoup sensible, ce ieune homme d'un plain fault, me dict que son pere auoit donné l'estre a quantité d'enfans, ausquels il auoit laissé beaucoup d'honneur a partager, mais des biens, si peu qu'ils ne suffisoient (depuis que la Paulette estoit establie) pour se faire pourueoir d'un office d'Huissier au Parlement, auquel son pere auoit tenu l'un des premiers rāgs, & quen'ayant moyen de faire mieux, il hazardoit ce peu qui luy restoit en intention s'il faisoit fortune de s'en preualloir en l'acquisition de quelque

charge, sinon qu'ils'en iroit comme beaucoup d'autres, pescher des escreuilles sur les Pyramides d'Egip-
te, ou en tout cas il se confinerait en quel que Monastere pour y passer le
reste de ses iours en paix, voila les ef-
fects de ceste Paulette dont le seul sou-
uenir nous deburoit estre odieux, &
neanmoins qui tiét le hault bout en ce
temps ou la vertu languit ayāt pour ad-
uersaire vn si puissant ennemy qui luy
faict teste & qui desia par vn audacieux
effort marque son empire en tous les
endroits de ce Royaume, de telle fa-
çon que les vniuersitez qui estoient
reuerées & admirées de tous pour les
bonnes lettres qui y florissoient sont
desertes, delaisées des muses & des
hommes doctes qui autrefois tenoient
a honneur d'y faire leur sejour & les-
quels maintenant attirez par les cares-
ses de nos voisins se banissent de leur
propre patrie pour se retirer vers les
estrangers ou la vertu est recompēsee
selon son merite estant vray qu'en ostant
les recompenses & loyers & honnestes
exercices les mesme exercices se perdēt
incōtinant comme occupations desti-
tuees

tuées d'honneur & de gloire, Le Lyon, dict le prouerbe, se recognoist a ses ongles, les môstres qui naissent de la Paullette nous font assez recognoistre que si bien tost elle n'est retranchée, si ses monstres ne sont estouffez a leur naissance, & qu'on ne se serue du remede present, il est a craindre que lors que le temps l'aura d'auantage aucthorisée ceste quangrene s'emparant des plus nobles parties de cet estat le chef n'en ressent le dommage a la diminution de l'aucthorité Royale, puisque desia sur vne simple proposition qui a esté faite on a veu tous les officiers se remuer comme si ils eussent voullu demander au Roy vne indemnité ou quelque desdommement de la grace qu'il leur a faicte d'auoir asseuré leurs charges durant plusieurs années & en auoir par ce moyen tellement augmenté le prix que tel se trouue auioird'huy pourueu d'un office duquel il retireroit a present cent mil liures qui ne luy a cousté que douze mil auant le droit annuel, & neantmoins ceste corde ayant esté touchée par les Estats, a pensé rompre l'armoye de ces trois

ordres, mais Dieu y ayant mis la main
 a dissipé les mauuais desseins de ceux
 qui croyoient par des raisons trop fri-
 uoles, rendre leurs charges hereditai-
 res de leurs maisons, & soubz des pre-
 textes specieux en apparence, contre-
 carer l'aduis de tant de gens de bien,
 voyez ie vous prie si ceste playe s'inue-
 tere d'auantage, quel espoir de guarir-
 son, sinon que nous verrions vn iour les
 offices les plus releuez, voire mesme
 ceux de la Couronne, & peut estre les
 gouuernements peu a peu, estre receuz
 au benefice de ceste Paulette, de quoy
 vous ne debuez vous estonner si vous
 considerez combien d'importans offi-
 ces si sont coulés, qui en auoient esté
 reiettez au commencement, & les-
 quels l'auarice ou la faueur, y a depuis
 introduicts, combien plus facilement
 ceux qui possèdent les grandes char-
 ges qui ont ces deux moyens en main
 s'en pourront ils seruir lors qu'ils reco-
 gnoistront l'occasion preparee de ce
 faire, ny aperceuez vous pas desia de
 l'acheminement par la venalité de la-
 quelle a peyne se peult on deffendre
 pour en esconduire ceux qui auront

rendu de signalez seruices ; tandis qu'on verra les autres qui ne seruent qu'a leur ambition iouyr de ceste grace a plain voile , ce que ie dits de ces grâdes charges , ie ne l'ose pas encores asseurer des benefices, biẽ que ces coadiutoireries qu'on introduit maintenãt pour les conseruer & empescher qu'ils ne vacquent, soit la mesme chose, mais qui a cours sous vn nom plus specieux pour mieux deguiser l'affaire, ie sçay bien que me direz que ce priuilege n'est general, qu'il n'est cõcedé qu'a bien peu sous de grandes considerations, ie suis des vostres pour ce regard, mais souuenés vous que comme les bonnes coustumes se perdent par laps de tẽps, les mauuaises qui succedent se grossifissent aussi avec le mesme temps, au iourd'huy celuy cy aura par la voye de gratification faict créer vn sien parent coadiuteur en son benefice, demain vn autre l'obtiendra pour recompense de quelque seruice qu'il aura rendu, & puis vn autre bien tost apres en donnera recompense, & ne fera nulle difficulté, de maquignonner ceste grace par voye de pactions illicites, ainsi à la

longue, ces coadiutoreries seront a l'égard des benefices ce que les suruiuan-
ces sont aux offices, contre lesquelles
suruiuances, vous sçauiez on a autres-
fois crié a bon escient, mais le mal ne
commençoit qu'a paroistre, la suite a
bien monstre que la trop grande bon-
té & facillité de nos Roys les portent
souuent a la tollerance de beaucoup
de choses qui leur tourne à grand pre-
judice, nous auons veu ceste cheine
qui nous a cõduit iusques a la Paulette
auoir commencé par la venalité des
offices, de la venalité aux suruiuan-
ces, de la au droit annuel, encor est
il a craindre qu'ils soient bien tost
hereditaires comme les fiefs sont
maintenant, & si on ny apportel'an-
tidote necessaire nous sommes assez
ieunes l'un & l'autre pour veoir les
benefices courir mesme fortune quel-
que effort que facent les gens de bien
de crier contre la Simonye qui est a
present assez commune, mais qui le
fera d'auantage, & par aduanture bien
tost en parties casuelles, si on suit le
train encommencé ne vous en estonnés
pas si ie le vous dits, vn tēps fut que les

offices estoient autant ou plus religieusement donnez que les benefices conferez , desquels benefices il fault que vous croyés que la vente ne feroit au iourd'huy si odieuse que la venalite des charges l'estoit du tēps que pour y estre receu , il falloit iurer n'auoir rien payé de l'office duquel on estoit pourueu , mais ce vieux Saturne destruit toutes choses & rend faciles celles qui au commencement nous paroissent impossibles , sur tout quand on preste l'espaule aux inuentions , & que le bien public , est mis au rabais par les encheres des partisans desquels le bien n'augmente iamais que celui du public ne diminue.

Voila (cher cousin) les maux que produict ceste Paullette outre ceux qui ont esté touchez & representez au Roy par vn discours qui luy a n'agueres este adressé lequel ie vous enuoye , m'assurant que les raisons que vous y remarquerez seront assez fortes pour vous attirer a l'opinion de cet auteur , neanmoings prenez garde de ne vous y attacher tellement qu'au jugement que vous ferez de ce droit annuel

vous n'y apportiez vn esprit attrempé, car bien que ceste maladie soit tres-dangereuse & qu'il soit necessaire d'y pourueoir, il faut auant qu'en venir la recognoistre, la nature & qualité de mal, & sçauoir si l'entreprenant on en introduict point vn plus grand. plus vn vlcere est anuiellie d'autant plus comme vous sçauiez la cure en est difficile & est on souuent necessité de recourir aux remedes extraordinaires mais non si violens qu'ils puissent irriter le mal notamment quand il se rentre en la personne de ceux dont le salut de plusieurs dépend, La playe que la Paultette a faite est inueterée par tant d'annees qu'elle se rend cōme incurable d'aporter a cest extrême mal vn extrême remede il semble que ce seroit hors de saison maintenant que ceste affaire regarde les meilleures familles de la France qui toutes ou la plus part y sont interressees & lesquelles ressentiront le dommage d'autant plus grand si tout d'un coup on y porte violemment la main au lieu des remedes lenitifs qui peuuent avec suite de temps consolider ceste playe, ie sçay

bien que ceste consideration n'a point
 de lieu en matiere d'estat ou tout est
 estimé bon qui profite au public le-
 quel trouue tousiours iuste ce qui est
 raisonnable, voire que quelquesfois il
 est force de faire tort en detail pour fai-
 re droit en gros, si est-ce qu'il semble
 n'estre raisonnable de laisser les choses
 qui se peuuent faire avec vne tardiue
 asseurance au contentement de tous
 pour courir aux soudaines & precipi-
 tees a la ruine de plusieurs, les extrémi-
 tez en sont vitieuses, la moderation
 son contraire a volontiers la vertu
 pour compagne mesmement en l'es-
 colle chrestienne ou l'on tient qu'il
 n'est pas permis de faire vn mal tant pe-
 tit soit il sous lesperance d'vn grand
 bien, reuenons donc la que la Paullet-
 re est vn mal tres-dangereux a l'estat,
 qu'il y doibt estre pourueu, que le pe-
 ril est au retardement mais qu'il faut y
 apporter de la moderation & peu a peu
 s'en defaire par des remedes doux &
 benigns, qui serôt faciles a recouurer
 si on y employe les inuentions des gens
 de bien dont on se doibt seruir en la
 necessité de ceste affaire, a Dieu.

FIN.

